

## Xajon ra ma-ni jò ra tsikínda jè Pedro

**Kó'sín jè Pedro síhixo'ta xítà ra síkasén-la xajon**

**1** <sup>1</sup>Añ, ra Simón Pedro 'mì-na, ra xítà chi'nda-la Jesucristo ma kò nga tì'koaá 'an tsikíxáya-na, tísikásén-no jè xajon rakìi, jìòn ra ngàsòn nda makjiín-no a'ta 'tse Cristo koni 'sín nga tì'koa nda makjiín-najin ra jin; nga xítà kixíí jè Cristo ra Nainá-ná ra bachrjekàjin-ná kjo'hi'in. <sup>2</sup>Koni 'sín nga isa nda inchi'yaxkon-isa jìòn jè ra Nainá kò jè Jesús ra tìjna ítjòn-ná, kò'sín isa tse kjonda kò tse kjoa'nchán katasakó-isa-la inìma-no.

**Kótjín ndiyá-la kjonda ra machjeén nga 'se-ná**

<sup>3</sup>Jè nga'ñó-la Nainá títsjá ijye-ná nga'tsì ra machjeén-la jè kjobinachon-ná kò nga'tsì ra machjeén-ná nga tsje sijché ijo-ná. Kíí kò'sín títsjá-ná nga'tsì kjonda kìi ta ngatjì-la nga ijyeé nda 'yaxkeén jè ra xá kìichja-ná kò batoó jeya tìjna ra jè, kò xá 'koaá 'sín nda-ni xítà. <sup>4</sup>Kò a'ta 'tseé kjoa kìi nga kò'sín tíjtábé-ná kjoa ra 'ñó nda tìjn kò ra 'ñó chjì-la ra ijye kò'sín kitsò Nainá nga tsjá-ná, mé-ni nga a'ta 'tse kjoa kìi kòkò'ta-te-ná nga kò'sín 'siéén koni 'sín 'sín Nainá, nga jíén ijyeé tsincha'taxìn-lá kjoa'cho ra faajin-la ijo-ná ra tìjn ya isà'nde ra ta síkítsón-ná. <sup>5</sup>Kíí kò'sín machjeén-ni nga 'tì nga'ñó-la ijo-no a'ta 'tse jñà kjoa kìi. Koni 'sín nga makjiín-no a'ta 'tse Cristo, 'koaá tì'sín nda xítà 'tiàn; tsa ijyeé nda jìòn xítà, 'koaá tì'sín kata'se-no kjoachjine; <sup>6</sup>Tsa ijye tìjn-no ra kjoachjine, kò'sín nda tatexoma-la ijo-no; tsa ijye nda batexoma-la ijo-no, katachíkjoako-no ta mé kjoa-nioo; tsa chíkjoako-no ta mé kjoa-nioo, tiskón-cha Nainá; <sup>7</sup>Tsa tìjn-no

kjoaskon a'ta 'tse Nainá, tsjacha 'tiaàn xàngioo nga jngó jngó-no; ko tsa tsjacha-no xàngioo, ti'koaá tsjacha 'tiaàn ra kj'íi xita.

<sup>8</sup>Tsa tjín-no nga'tsi kjonda kii, ko tsa nichjin nichjón-ní tísakó-isa-najìon kjonda kii, tsó-ni kjoa nga mì tsa ta titsahijyo 'tsè jìon, ko isaá tse kjonda sakò-isa-najìon koni 'sín nga inchi'yaxkon-isa Jesucristo ra tìjna ítjòn-ná.

<sup>9</sup>Tanga tsa tjín i'ka xita ra mì kì ko'sín inchisíjchá ijo-la, mì kì nda tsijen-la, xita xka-ní, ijyee ki'chaàjin-la nga ijyee kinihijchaà'ta-la jé ra tjín-la ti'sa kjotsee. <sup>10</sup>Jìon ndí 'ndsé ko ndí tichjeé, 'ti nga'nò-la ijo-no nga tikixiya kjoa koni 'sín nga Nainá xá kùichja-no ko tsjahíjin-no. 'Kia tsa ko'sín 'sian ki'ta jìon, nikjiá skajen-ngi jìon. <sup>11</sup>Ta isaá jnchro, ngi jngo 'ká kjón-ní tjáxa'nde-no nga kitjáha'seen nándá nga tibatéxoma skanda ta mé nichjin-ni jè Jesucristo ra tìjna ítjòn-ná ko ra bachrjekàjin-ná kjohi'in.

<sup>12</sup>Ko 'koaá 'sín síkítsjen-yá ki'ta-najìon jñá kjoa kii, ni'sín takó ijyee 'nò nda 'ya jìon ko ni'sín 'nò nda kj'i'ta takòn jìon jè kjohixi ra ko'sín ijyee 'ya jìon 'ndí 'ndi-ni. <sup>13</sup>'Koaá 'sín machiya-na nga 'koaá 'sín tjínè-na nga síkítsjen-yá-la kjobítsjen-najìon, 'kia nga takó tìjna-isa i isà'nde. <sup>14</sup>Nga ijyee be-náa nga ta chibaá nichjin chija-isa nga kjehe'tà nichjin-na, nga 'koaá 'sín ijyee isìchiya tsijen-na jè Jesucristo ra tìjna ítjòn-ná. <sup>15</sup>'Koaá 'sín ítsikiné-la ijo-na mé-ni nga ijyee tjín kixi-ni kjoa, nga 'koaá 'sín síkítsjen-yá ki'ta-najìon kjoa kii, 'kia 'an ra ijyee iko-na Na'in-ná.

### Nándá nchrabá-ní 'én rakii

<sup>16</sup>Nga mì tsa ya tsangìtjìngi-lajin koni tsò xita ra 'bénajmí kuendo ra ta jñá bínda, 'kia nga ko'sín tsi'kènajmí-lajin a'ta 'tse nga'nò ra tjín-la Jesucristo ra tìjna ítjòn-ná ko koni 'sín nga koma 'kia nga kj'íi india-ni ra jè. Nga nda kjón-ní kijcha-jin jè kjoajeya-la, ko 'koaá 'sín tsi'kènajmí-jin. <sup>17</sup>'Kia nga jè Nainá ra Na'in 'mì-lá jeya ko 'nga isíkijna; inchrabà jngo-ni 'én ya ajin isén i'ngaá nándá nga 'nò jate tsatsíjen ra kitsò: “Jé rakii I'ndí-na ra 'nò tsjake, batoó tsja tjín-la takoàan ra a'ta 'tse.” <sup>18</sup>Ngajin sabá ina'yá-lajin 'én rakii ra ngajmi inchrabà-ni, nga yaá taña titsajna-ko-jin jè Jesucristo 'kia nga ko'sín kjomà ya asòn'nga-la nindo tsje.

<sup>19</sup>Ti'koaá tíjnaá-te-ná 'én ra síkixiya-ná, ra kiichja jñà xita ra kiichjaya ngajo-la Nainá. 'Nó nda-ni 'kia nga ko'sín nda inchinìsin-la jñà 'én kiì, ra ko'sín jngoya-la koni jngo kandì ra síhsen ya i'nde ñánda jñò chon, skanda 'kia nga ijye nda kotsíjen nga ko nichjin, ko kohisen-jín ya inìma-najiòn koni tsa tjó kjòn jè nitse-xó ra tjo 'kia nga xaya. <sup>20</sup>Jè ra nda katasijin ítjòn-najiòn, jé-ní, nga nijngo 'én ra tjí'ta ya xajon ñánda nga tíchja 'én-la Nainá, ra ta sko xita tsachrje-nì 'kia nga kisinda. <sup>21</sup>Nga nijngo 'én-la Nainá ra kiichjaya xita kiì ra ta kjobítsjen 'tse xita inchrabà-ni; jè sabá Inìma Tsje-la Nainá kisihichiyajin-la kjobítsjen-la jñà xita kiì 'kia nga ko'sín kiichjaya ngajo-la Nainá.

**Xita ndiso ra bakón-ya 'én-la Nainá ra mì tsa kixi kjoa**

(Judas 4-13)

**2** <sup>1</sup>Tanga ki'seé-te ya ajin naxindá Israel xita ra ta iskondacha, ra mì tsa kixi kjoa nga jè Nainá kiichjaya ngajo-la; 'koaá tí'sín 'se-te ya ajin tsajiòn, xita ra ta skoondacha-te ra kitsò nga maá-la bakón-ya ra a'ta 'tse Nainá. Jñà xita kiì, nda mí jcha-la kó'sín nga sìkjaha'sen-jin-najiòn kjobítsjen ra sìkítsón-no ra a'ta 'tse Nainá. Ko skanda kochrjengií jñà xita kiì Na'ín-ná ra tsikíchjítjì-ná; tanga 'kia nga ko'sín 'siin, tijná koàtsji-ni kjohi'in ra ta nditoón sìjchijajin ijo-la. <sup>2</sup>Kjín xita ya kijitjingi-la nga ko'sín 'siin koni 'sín tjín kjoa nañá ra 'sín; ko ta jñà ngatjì-la jñà xita ndiso kiì nga jè ra ndiyá kixi 'choó kinákjoajno-la. <sup>3</sup>Jñà xita kiì, ta jé mejèn-la nga isa tse tsajmì 'se-la; 'koaá ma-ni nga ta tsò ta maá 'én ra bínda nga ma kochrjekajno-no ton. Jñà xita kiì, tí'sa kjotseé tíjnanda-ni kjohi'in ra koko-la, ko mì kì ma kotojin kjohi'in kiì.

<sup>4</sup>Jè Nainá nda mí isihijcha'ta-la jñà ìkjalì ra tsakátsji-jé; ta isaá yaá isikatsajo ya i'nde ñánda tjín kjohi'in, ko yaá isíkítsajna'ño ya ñánda jñò chon mé-ni nga ya katakoñá-ni skanda 'kia nga jè Nainá kùndajín-la. <sup>5</sup>Jè Nainá, tí'koaá skanda mí isihijcha'ta-la xita isà'nde ra ki'se kjotseé, ta isaá jngo jtsì xkón isìkasén-nè nga'tsì xita 'cho ra tjín 'kia. Ta jé xita ra tsi'kin Noé isikatojin, jè ra kiichjaya-la xita kó'sín nga kixi sìjchá ijo-la, ko ngi ito xita tsato-isa ra a'ta 'tse jtsì xkón. <sup>6</sup>Nainá tí'koaá skanda isikjehesòn ijyeé-te nga'tsì

xita-la naxindá Sodoma ko naxindá Gomorra. Ngi ta chijoó ki'sin-isa, 'koaá 'sín tsikíjna koni jngo xkósòn, mé-ni nga kata'ya-la kó'sín koma'tin jñà xita ra kondra títsahijyo-la Nainá. <sup>7</sup>Tanga jè xita ra tsi'kin Lot ra xita kixi ya ngixkon Nainá, isikatojiín kjohi'in. Jè Lot 'ño 'cho kjomà-la koni 'sín ta 'cho isíjchá ijo-la xita kii. <sup>8</sup>Nga yaá tsikijnajin-la jñà xita kii ra 'ño 'cho ki'sin, tseé kjohi'in isikjiín ndí inìma-la nga nichjin nichjòn, ta ngatji-la jñà kjoa ra 'ño 'cho tjín ra kijtse ko ra kií'nchré nga ki'ta nichjin. <sup>9</sup>Í ijndí síchiya-ná nga jè Na'ín-ná maá-la síkatojin kjoa jñà xita ra nda kji'ta ikon Nainá; ko síkítsajnandaá jñà xita ra 'ño 'cho 'sín, mé-ni nga tsjá-la kjohi'in 'kia nga kijchò nichjin nga sindajín-la nga'tsi xita.

<sup>10</sup>Ko jñà kjón tsjá ítjòn-la kjohi'in, jñà xita ra 'ño tsjake kjoa ra faajin-la ijo-la ra 'ño tjé tjín ya ngixkon Nainá ko nga bachrjengi kjotéxoma ra tjín-la Nainá.

Jñà xita ndiso kii, batoó xita táhijín ko ni ta mé ra sasén-la; mi kì tsa tsakjón nga chjajno-la jñà ra títsajna ítjòn ra tse nga'ño tjín-la, jñà ra mi kì tsijen-ni. <sup>11</sup>Skanda jñà ikjalí 'tse Nainá ra isa tse nga'ño tjín-la ko isa tse kjotéxoma tjín-la, mi tsa ko'sín chjajno-la ya ngixkon Nainá jñà ra títsajna ítjòn nga tse nga'ño tjín-la.

<sup>12</sup>Tanga jñà xita kii, skanda chjajnoó-la jñà kjoa ra mi kì fìya-la. Mi kì síkítsjen kjoa ra 'sín. 'Koaá 'sín ngoya-la koni tsa cho ra xá ko'sín kitsin-ni nga ma kindaba nga si'ken. Ko 'koaá 'sín koma'tin koni jñà cho nga ta yaá jchijajin isén. <sup>13</sup>'Koaá tí'sín tjín kjohi'in ra 'ki-la koni 'sín tjín kjoa'cho ra kisiko xita ra kjíí. Nga ni'sín 'kia nichjin 'ño matsja-la nga kotjín kjoa'cho ra 'sín ya ajin-la xita. 'Nó tse kjosabà-ni jñà kjoatjé ra 'sín 'kia nga ya síngásòn-ko-najìòn nga bíjna 'sí, nga yaá sítsjako ijo-la ko kjoa'cho ra bíndisoko-no.

<sup>14</sup>Tsa 'kia jngo chjoón be, nditoón faajin-la; mi kì majngo ikon tsa mi koaàtsji-jé; sasaá bíndisoko ndí xita ra mi 'ño tjín ikon; ngi ta jé mejèn tsje-la ta mé-ni; xita ra ko'sín 'sìon, xá 'koaá 'sín 'ya-ni nga kjohi'in skajin. <sup>15</sup>Ijyeé kitsjin-tákon ra ndiyá kixi. Mi kì ti be-ni nándà tjíma, yaá inchifitjngi koni 'sín ki'sin jè xita ra kiichjaya ngajo-la Nainá ra tsi'kin Balaam, ti-la xita ra tsi'kin Beor. Jè Balaam, jè ra 'ño kjotsjake ton ra mi tsa ko kjohixi-la isikijne. <sup>16</sup>Ta ngatji-la jè kjoa'cho ra ki'sin Balaam jaká-la. Jngo burra ra mi ma-la chja, kiichja-la koni

'sín chja jngo xita; ko 'koaá 'sín kisatechjá-la kjoaská ra tí'sín jè xita rakìi.

<sup>17</sup>Jñà xita ndiso kii, 'koaá 'sín ngoya-la koni jngo ngajo nandá ra tsin-la nandá, koni ifi jñò ra 'ñó fiikó tjo. Ijyeé ko'sín tjínè-la nga ya sijkjiín kjohi'in skanda ta mé nichjin-ni ya i'nde ñánda nga 'ñó jñò chon. <sup>18</sup>Ngi ta 'én 'nga ikoón chja ra nimé chjí-la. Ko jñà síchjeén kjoa'cho ra sasén-la ijo-la nga bíndocha-la jñà ndí xita ra 'saá bí'tsia nga inhibítjokajin-la xita ra 'cho inchisíjchá ijo-la. <sup>19</sup>'Koaá 'sín tsò-la jñà ndí xita ra bíndocha-la, nga sijkítsajnandíi-ni a'ta 'tse kjoa ra 'cho tjín, tanga ra jñà, skanda mì kì ma bitjójin kjoa'cho ra títsajin. 'Kia nga jngo kjoa síkijne-la xita, yaá tí'tá'ñó-la. <sup>20</sup>Tsa ijyeé itjójin jnchro kjoa 'tse jé ra tjín ya isà'nde, 'kia nga kijtsexkon Jesucristo ra tjina ítjòn-ná ra ma-la bachrjekàjin-ná kjohi'in; tanga tsa ya skajin india-ni kjoa'cho ra tjín ya isà'nde, isaá ta 'cho koma'tin india-ni, nda mí 'koa-ni koni nga 'sa ítjòn. <sup>21</sup>Isaá-la nda-la jñà xita kii tsa mì kijtsexkon ndiyá kixi 'tse Nainá, nga í'tsín kiji-la kjotéxoma tsje-la Nainá ra ki'tsi-la 'kia nga ijye kijtsexkon. <sup>22</sup>Tanga 'koaá 'sín inchima'tin jñà xita kii, koni 'sín tsò 'én kixi ra tsò: “Jè nañá, tíjé kjine india-ni jè ndábisò-la”, ko jè ra tsò: “'Kia nga ijye nikindòya jngo chinga, indiaá ya fikjajnjin india-ni ya ñánda nga ijncha ndási.”

### 'Kia nga kjíi india-ni Na'ín-ná Jesucristo

**3** <sup>1</sup>Ndí 'ndsè ra 'ñó matsjake-no, jé xajon rakii ra ma-ni jò ra tíbindá-no; ta ngajò xajon kii, 'koaá 'sín síkítsjen-yá-no nga jñà tiya skò kjóbítsjen ra kixi tjín, <sup>2</sup>mé-ni nga ko'sín síkítsjen-yá-najìon jñà 'én ra tsakón-ya nga 'sa kjotseé jñà xita tsje-la Nainá ra isichjeén nga kiichja ngajo-la, ko jñà kjotéxoma 'tse Na'ín-ná ra tjina ítjòn-ná ko ra tsachrjekàjin-ná kjohi'in koni 'sín nga kitsò-no jñà xita-la ra jè tsikíxáya-la.

<sup>3</sup>Jé ra 'ñó machjeén nga nda katasijin-najìon, 'kia nga kochraña nga kjehe'tà nichjin, 'seé xita ra siitsja'tin-najìon, ra ya kítsajin kjoa'cho ra síjé ijo-la; <sup>4</sup>nga kitsò: “¿Ñánda tjina-ni jñà 'én ra kitsò nga kjíi india-ni Cristo? Ijyeé 'ken tsje-ni xita jhínga, ko takó 'koaá chon 'ndi-ni koni 'sín chon skanda 'kia nga tí'sa isinda isà'nde.” <sup>5</sup>Tanga jñà xita kii, ta xá 'koaá 'sín síjchaàjin-ni nga jè ngajmi tjina-ni skanda tí'sa kjotseé, ko jè nangi a'ta 'tseé nandá inchrabà'ta-ni ko yaá tsatsíjen ya ajin

nandá koni 'sín tsò 'én ra kiichja Nainá. <sup>6</sup>Ko tije-ni 'én ra kiichja Nainá ra ko'sín ki'sín nga nandá kisikjehesòn jñà xita ra tjin jè isà'nde ra tjna nichjin 'kia. <sup>7</sup>Jè 'én ra kitsjà Nainá, 'koaá 'sín tsò-te nga jè ngajmi ko nangi ra tjin 'ndi 'ndi, 'koaá 'sín ijye títsajna mé-ni nga kiti-ni 'kia nga kijchò nichjin nga sindajin-la nga'tsi xita isà'nde ko ti'koa kjehesòn ijye nga'tsi xita ra mi kì bexkón Nainá.

<sup>8</sup>Jìon ndí 'ndsé ra tsjake-no, kì niijchaàjin jìon kjoa kii: Nga jè Na'ín-ná, ra jngo nichjin, 'koaá 'sín tsò-la koni tsa jngo jmi nó tjin-ni; ko jè ra jngo jmi nó, 'koaá 'sín tsò-la koni tsa jngo nichjin tjin-ni. <sup>9</sup>Mì tsa tsò-ni kjoa nga jè Na'ín-ná ijyeé tífichjin-la nga mì kì tísíhitjasòn jè 'én-la ra ijye kitsjà koni 'sín tsò i'ka xita; jé-ní nga batoó tse inìma-la Na'ín-ná nga tíkoñákjoa-ní ra a'ta tsajìon; majìn-la nga nijngo xita jchija, jé mejèn-la nga nga'tsi xita katasíkájno-ni jé-la nga kátáfa'ta-la Nainá.

<sup>10</sup>Tanga jè nichjin-la Na'ín-ná, 'koaá 'sín kj'íi koni 'sín 'fii jngo jè ra xita chijé. 'Kia nga kijchò nichjin, jè ngajmi ta indaa jchija ko taxki 'choó kiná'ya-la koni 'sín nga koma. Jñà nitse, jè tsá'bí, ko jè sá ngi ta ní'í konandá-ni. Ko jè nangi ko ta mé-isa-nioo ra tjin a'ta nangi, jngo 'ká jti.

<sup>11</sup>Nga xá 'koaá 'sín tjinè-la nga kjehesòn nga'tsi tsajmì ra tjin. ¿A mí tsa tjinè-la nga isa tsje sijchá jìon ijo-no?, ko ti'koa isa nda jchaxkón jìon Nainá nga nichjin nchijòn, <sup>12</sup>nga jchíña-la nga kj'íi jè nichjin 'tse Nainá; ko ko'sín kìnè-la ijo-no nga isa ndìton kj'íi jè nichjin ra kii, 'kia nga jè ngajmi, jngo kjá ta yaá jchija nga kiti; ko nga'tsi tsajmì ra tjin isà'nde, jngo kjá ta yaá konandá nga kiti. <sup>13</sup>Tanga ra jién, ijyeé ko'sín chiná-lá jè 'én ra ijye kitsjà-ná Nainá; nga jngoó ngajmi xitse ko jngo nangi xitse tijnanda-ná ra jién, ya ñánda nga ngi ta kjokixií ra 'se.

<sup>14</sup>'Koaá ma-ni jìon ndí 'ndsé ra 'nó tsjake-no, tsa ijyeé ko'sín inchichiña-la jñà kjonda kii, 'ti nga'nó-la ijo-no nga 'nchán títajna ko tsje títajna mé-ni nga nimé jé títajin-no 'kia nga kj'íi india-ni Jesucristo. <sup>15</sup>'Koaá 'sín nda katasijin-no, nga koni 'sín tíkoñákjoa jè Na'ín-ná, kii-ní nga mejèn-la nga nga'tsi xita katitjokàjin kjohi'in. 'Koaá 'sín ijye tsikínda-te-no xajon jè 'ndsé Pablo ra 'nó matsjacheé, koni 'sín jè Nainá kitsjà-la kjoachjine. <sup>16</sup>Kjameé ta nga'tsi xajon ra tsikínda jè 'ndsé Pablo ko'sín tíchja ra a'ta 'tse kjoa kii. Ko tjin i'ka ya ñánda nga 'nó

i'in tíchjā, kō jñà xitā ra kjè mé be kjin, kō jñà ra mì tsa jngo tjin kjòbítsjen-lā síkaatjìyaá-lā koni 'sín nga fìya-la. Kō 'koaá tì'sín síkō ta ñáa-isa xajon-lā Nainá. 'Kiā nga kō'sín 'sín, tijná inchisíjchija-ni ijo-la.

### 'Én ra fehe'ta-ni

<sup>17</sup>Koaá ma-ni jìòn ndí 'ndsé ra 'ñó tsjake-no, 'kiā nga ijye tjjin-no ra a'ta 'tse kjoā kìi, nda tìkindaa ijo-no, mé-ni nga mì yā kii'ndo-no nga yā iko-no ndiyá ndiso-lā jñà xitā ra 'ñó 'cho tjin kjoā ra 'sín. Kō tsa yā skajìòn kjoā ndiso-lā, sijchija-no koni 'sín nga kixi tincha a'ta 'tse Nainá. <sup>18</sup>Yáá isa nda katajchájìn jìòn a'ta 'tse kjòbítsjen kō kjònda ra tsjá-no jè Jesucristo ra tjna ítjòn-ná kō ra bachrjekàjin-ná kjohi'in. Kō'sín jeya katijna ra jè, 'ndi 'ndi kō skanda ta mé nichjin-nioo. Kō'sín katama.